

## Mahasiswa digesa bina kecemerlangan diri, tingkat kemahiran insaniah

Menteri Pengajian Tinggi Malaysia, Dato' Seri Mohamed Khaled Nordin, menggesa 40,366 pelajar yang telah berjaya mendapat penempatan bagi meneruskan pengajian di Institusi Pengajian Tinggi (IPT) seluruh Malaysia membina kecemerlangan diri membentuk barisan graduan yang berupaya berperanan sebagai *global player* yang mampu meneroka alam kerjaya yang amat kompetitif.

Beliau berkata demikian semasa merasmikan Minggu Induksi Siswa 2010 (MINDS) di Kompleks Sukan Universiti Malaysia Pahang (UMP) di hadapan seramai 1,674 pelajar yang mendaftar sebagai pelajar UMP pada 4 Julai 2010 yang lalu.

Katanya, pihak kementerian sendiri menekankan elemen *soft skills* atau Kemahiran Insaniah sebagai salah satu komponen utama dalam kurikulum pengajian di IPT tempatan.

Komponen ini adalah bersifat komplementari kepada teori dan *hard skills* yang dipelajari, sekaligus membentuk para mahasiswa sebagai individu yang seimbang dan holistik.

Menurutnya, setiap tahun kerajaan membelanjakan sejumlah peruntukan yang besar untuk memastikan golongan muda di negara ini mendapat pendidikan tinggi.

"Kerajaan menyediakan subsidi yuran pengajian secara purata sebanyak RM85,000 bagi setiap pelajar yang melanjutkan pengajian ke IPT setiap tahun.

"Ini berdasarkan peruntukan sebanyak RM8.5 bilion yang disediakan dalam bentuk subsidi yuran pengajian membabitkan kira-kira 100,000 pelajar di dalam dan luar negara

tahun lalu.

Jelas beliau lagi, keputusan kerajaan ini dibuat dengan mengambil kira kos sara hidup yang semakin meningkat pada ketika ini dan sebagai sebahagian daripada usaha kerajaan meringankan beban pelajar dan ibu bapa.

Sebagai contoh, katanya, bagi pengajian kejuruteraan, kos sebenar pengajian selama empat tahun adalah sebanyak RM105,404 dengan kerajaan membayar RM94,644, manakala pelajar hanya membayar RM10,760.

"Ini menunjukkan kerajaan memberi subsidi sebanyak 90 peratus dengan mengambil kira pelbagai faktor, termasuk tanggungan pelajar dan ibu bapa.

"Selain itu, kerajaan juga telah menyediakan pelbagai biasiswa dan juga pinjaman pelajaran yang disediakan melalui Perbadanan Tabung Pendidikan Tinggi Nasional (PTPTN).

"Baru-baru kementerian mengumumkan bahawa kerajaan telah bersetuju untuk meningkatkan jumlah pendapatan ibu bapa pelajar yang memohon pinjaman penuh PTPTN dinaikkan daripada RM3,000 kepada RM4,000," katanya.

Sementara itu, Naib Canselor UMP, Profesor Dato' Dr. Daing Nasir Ibrahim berkata, UMP menawarkan seramai 2,570 untuk mengikuti pengajian di UMP. Daripada jumlah itu, seramai 2,270 pelajar ditawarkan mengikuti program di peringkat sarjana muda, manakala 300 lagi bagi program diploma.

Menurutnya, penganjuran MINDS memberi peluang kepada mahasiswa untuk menyesuaikan diri melalui interaksi dengan rakan dan bimbingan fasilitator yang terdiri

di kalangan pelajar kanan yang berwibawa.

"Iklim pembelajaran dan suasana hidup kampus menuntut kelasakan minda dan ketahanan fizikal untuk menjadi lebih proaktif dan kompetitif.

Sesi pengajian kali ini menyaksikan UMP buat kali keduanya menerima seramai 29 orang pelajar antarabangsa yang terdiri daripada pelajar warga negara Iraq, Yamen, Somalia, Sudan dan China.

UMP juga buat pertama kalinya menerima sepuluh pelajar baharu yang akan mengikuti program Dwi Ijazah Sarjana Muda Kejuruteraan Mekatronik dari UMP dan Bachelor of Mechatronic Engineering dari Hochschule Karlsruhe Und Wirtschaft (Hska), Jerman.

"Ini merupakan hasil dari hubungan dan kerjasama strategik antara pihak UMP dengan pihak Hska yang telah menandatangani memorandum persefahaman sempena Forum Universiti-Industri 2010 baru-baru ini," katanya.

Hadir sama dalam majlis perasmian Ahli Lembaga Pengarah UMP, Khodijah Abdullah, Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus, Timbalan Naib Canselor (Akademik & Antarabangsa), Profesor Dr. Badhrulhisham Abd. Aziz, Pendaftar, Tuan Haji Mustafa Ibrahim.

Turut hadir, Dekan Jabatan Hal Ehwal Pelajar & Alumni, Profesor Dr. Yuserrrie Zainudin, Yang di-Pertua Majlis Perwakilan Pelajar (MPP) UMP, Mohd Aedlan Nur Ahmad dan Timbalan Yang di-Pertua MPP merangkap Pengarah Minggu Induksi Siswa 2010, Nor Hafizah Abdul Razak.